

TEZAU LITURGIC
17 AUGUST

SLUJBA
SF. CUVIOS
PIMEN
MIAȘNIKOV
DE LA UGREȘ



MOSCOVA, 2000



Месяца августа в 17-й день Преподобнаго Пимена, архимандрита Угрешскаго

На вечера

На Господи возвах: стихиры, глас 8.

Подобен: Что ты наречем:

Что ты ныне, Пимене, именуем? / Монахов
неленостнаго наставника, / общаго иноческаго
жития ревнителя, / нищих и странных питателя,
/ юным училище благочестия воздвигшаго, /
возобновителя Николо-Угрешския обители, / яко
другия лавры процветшия. // Моли спастися
душам нашим.

Что ты ныне, Пимене, провещаем? / Святителей
московских воли неленостнаго исполнителя, /
таже приснаго их помощника и друга, /
монастырскаго благаго чина блюстителя, / о
благотворителях обители молитвенника, /
присно благодаряща за вся Бога, / истиннаго
пастыря. // Моли спастися душам нашим.

Что ты ныне, Пимене, именуем? / Иноческаго
жития ревнителя, / истиннаго и нелицемернаго
постника, / царским путем шествовавшего, /
послушанию от юности навывкшаго, / усерднаго
молитвенника, / покаяния искренняго делателя.
// Моли спастися душам нашим.

Како тя ныне, Пимене, ублажим? / Обеты
монашеския истинно исполншаго, / послушание
возлюбльшаго, / нестяжание до часа смертнаго
соблюдшаго, / целомудрие телом и душою
явльшаго, / неленостнаго подвигов делателя, /
труды ко трудом приложшаго. / Моли спастися
душам нашим.

Слава: глас тойже:

Монахов множества / яко истиннаго наставника
тя почитают, / отче преподобне Пимене, / ты бо
образ трудолюбия и упования на Бога явил еси.
/ Блажен еси, Христа от юности возлюбив, /
Ему же и до конца дней поработал еси, /
ангелов собеседниче и преподобных
сопричастниче. // С ними же молися Господу
помиловатися душам нашим.

И ныне, праздника.

Вход. Прокимен дне, и чтения три
преподобническия.

На стиховне стихиры, глас 2.

Подобен: ДOME Евфрафов:

Дом и отечество земное, / от юности оставил
еси, / Царствия Небеснаго ради, / преподобне
Пимене, // егоже стяжал еси.

Стих: Честна пред Господем / смерть
преподобных Его.

Дом добродетелей, / исполнь богатства
духовнаго, / явися еси людем, / в житии твоём,
святе Пимене, // о них же и ныне молися.

Стих: Блажен муж бояйся Господа, / в заповедех
Его восхощет зело.

Дом святителя Николая обновил и украсил еси, /
с нимже о нас молися, / предодобне Пимене, //
пастырю истинный.

Слава, глас 5:

Преподобне Пимене, пребогате, / от юности
Христа возлюбив, / мир и козни его оставил еси,
/ и подвиги телесныя подъяв, / душу покаянием
очистил еси, / спасаяся в Бозе яко инок
неленостный, / множество к нему привел еси, /
яко пастырь ревностный. / Сего ради ныне
одесную Христа предстоиши / и дерзновение
имаши непрестанно молитися о нас.

И ныне, праздника.

Тропарь, глас 2:

Монашеское житие от юности возлюбив / и во
обитель Угрешскую вселився, / монахов
множества собрал еси / и всем требующим
благотворил еси, / ихже сердца согревая и
тяготы нося, / пастырь добрый явился еси, /
Пимене преподобне, // моли Христа Бога
спастися душам нашим.

На утрени

На Бог Господь: тропарь преподобнаго дважды.
Слава, и ныне, праздника.

По 1-й стихологии седален, глас 4:
Се, что добро, или что красно, но еже житии
братии вкупе — сице моляся, преподобне
Пимене, воздвигл еси обитель прекрасну,
множеством монахов добродетельных
исполнену, с нимже вкупе молися паки
обновитися обители Угрешстей.

Слава, и ныне, праздника.

По 2-й стихологии седален, глас 2:
Нищии и убозии, ближнии и дальни, монахи,
священнии и мирстии — сии благодарне
исповедуют страннолюбие, милосердие и
благостыню преподобнаго Пимена, воистину
пастыря добраго, отца чадом. Сего ради
молитесь вкупе с ним паки обновитися обители
Угрешстей.

Слава, и ныне, праздника.

По полиелеи седален, глас 5:
Отроцы и юнии благодарственно восхваляют
преподобнаго Пимена, той бо, яко благодетель
нелицемерный дарова им училище воспитания
духа и благочестия, кров и ограду. Сего ради

молитесь вкупе с ним паки обновитися обители Угрешстей.

Слава, и ныне, праздника.

Таже степенна, 1-й антифон 4-го гласа.

Прокимен, глас 4: Честна пред Господем смерть преподобных Его.

Стих: Что воздам Господеви о всех, яже воздаде ми?

Всякое дыхание: Евангелие от Матфея, зачало 43.

По 50-м псалме стихира, глас 6:

Преподобне отче Пимене, / во всю землю московскую изыде вещание подвигов и трудов твоих, / страсти телесныя искоренив, душу покаянием очистил еси, / темже обрел еси Царствие Небесное, / идеже вкупе с лики преподобных радуешися. / Дерзновение имея ко Христу Богу, // мир испроси душам нашим.

Канон преподобнаго Пимена, глас 8.

Песнь 1

Ирмос: Поим Господеви, проведшему люди своя сквозе Чермное море, яко един славно прославися.

Припев: Преподобне отче наш Пимене, моли Бога о нас.

От благочестивых родителей произшед,
благочестию издетска навыкл еси, преподобне
Пимене, сего ради на тебе исполнися писания
слово: благочестие ко всему полезно есть.

Слово Божие и алфавит духовный от юности
возлюбив, стяжал еси разум богопросвещенный,
Пимене преподобне, и последовал еси Христу,
учителю истины.

Святых и преподобных мужей в юности
встретив, Игнатия, Феофана Новоезерскаго,
Николая Блаженнаго и Льва Оптинскаго,
утвердил еси сердце твое в Бозе, преподобне
Пимене, и возлюбил еси монашеское житие.

Богородичен: От земли возшла еси к небу,
Пречистая Дево, яко древле людие Божии сквозе
Чермное море проидоша.

Песнь 3

Ирмос: Ты еси утверждение притекающих к
Тебе. Господи, Ты еси свет омраченных, и поет
тя дух мой.

Пение яко ангельское услышав преподобный
Пимен во Угрешстем монастыре, возрадовася
духом и помышляше в себе: се покой мой во век,
зде вселюся, яко изволих.

Лествицу послушаний монастырских законно
пройде, восприял еси жезл игуменский,
преподобне Пимене, имже добре упасл еси

врученное ти Богом стадо.

Житие общее монастырское во образ
единосущныя Троицы возлюбил еси, преподобне
Пимене, еже житии братии во едином душе,
едином хотении, едином деянии и любви.

Богородичен: Возрадовася дух твой, Пречистая
Дево, о Бозе Спасе Твоем, егда от земли
преставльшися, к Нему притекла еси.

Ин кондак, глас 1:

Тобою, преподобне отче Пимене, / обитель
Угрешская благоволением Божиим процветшая,
/ память твою ныне празднует / и ликующе
зовет: / слава Давшему тебе крепость, / слава
Венчавшему тя, // слава Действующему тобою
всем исцеления.

Седален, глас 4:

Наставляем от Господа, Пастыря Доброго, сам
пастырь явился еси, преподобне Пимене,
сопротивныя волки побеждая, и овцы стада
твоего в ограде монастырской благодатию
Божией сохраняя. Христа Бога прилежно моли
даровати и нам велию милость.

Слава, и ныне, праздника.

Песнь 4

Ирмос: Услышах, Господи, смотрения Твоего таинство, разумех дела Твоя и прославих Твое Божество.

Чудно видение бысть другу и благодетелю твоему, преподобне Пимене: се, множество птиц велиих на Угрешу яко на луг духовный, слетаются. Сице изъявися знамение воли Божией на обновление Угрешстей обители.

Яко сын и искренний друг, всякое попечение о благодетелях возложил еси на себе, преподобне Пимене, наипаче же молитвенное поминовение творил еси, благодарне моляся о них Богу.

Обеты нестяжания присно соблюдая, преподобне Пимене, ничтоже от дарованного благодетелями себе присвоил еси и, яко истинный монах, чужд стяжаний земных предстал еси Богу.

Богородичен: О велие таинство! Како честное Твое тело, Дева, тления во гробе не уведет, но с телом прешла еси от земли к небеси.

Песнь 5

Ирмос: Утреннюююще вопием Ти: Господи, спаси ны, Ты бо еси Бог наш, разве Тебе иного не вемы.

Избранник святителя Филарета быв, преподобне Пимене, присно волю того в Угрешстей обители

исполнил еси, яко богомудраго архипастыря и отца.

Бысть обитель Угрешская яко лавра, окормлением святителя Филарета, попечением щедрых благодетелей и строением преподобнаго Пимена, о нейже и ныне усердно молятся.

Егда страждал еси люте в болезни, преподобне Пимене, предстательством святителя Филарета исцеление получил еси, той бо, предстоя Христу, присно молится о чадах своих.

Богородичен: От Отца родивыйся Бог и в Тя, Благодатная, вшедый, прият Тя ныне яко Матерь и Приснодеву. Сего ради иныя заступницы пред Богом не вемы.

Песнь 6

Ирмос: Ризу мне подаждь светлу, одеяйся светом яко ризою, многомилостиве Христе Боже наш. Многи скорби, яко муж праведный, испытал еси, преподобне Пимене, но от всех избави тя Господь, по слову псалмопевца, и даровати покой небесный.

Воздержанием страсти телесныя и душевныя увядив, преподобне Пимене, дух мирен стяжал еси в жизни временней, и спасл еси множество душ, темже ликуеши ныне в Царствии Божии. Молитве усердней от юности навыкнув, преподобне Пимене, сугубо Бога молил еси до

самыя кончины о себе и о братии, сего ради
стяжал еси дерзновение ходатайствовать о нас у
престола Владычня.

Богородичен: Светоносный свещник
незаходимаго света, Богородице Дево, под
землею вмале сокрывшися, на небо во свете
возшла еси.

Кондак, глас 4:

Обитель Угрешскую возлюбив, преподобне
Пимене, / и пастырь и строитель тоя был еси, /
во всем воли Божией повинуюся, / монахом
чиноначальник и образ смирения явился еси. //
Моли Христа Бога спасти души наша.

Икос:

Возлюбив, преподобне Пимене, монашеское
житие, и отвергнув мира сего наслаждение,
притекл еси усердно ко Христу и был еси
пастырь во обители Угрешстей, просвещая
землю московскую подвиги духовными. Тем,
припадая, молю тя: просвети мои очи душевнии
воспети твоя подвиги: пощение, молитвы, слезы,
болезни и труды блаженныя ради будущия
жизни, еяже ныне наслаждаешься, моля Христа
Бога спасти души наша.

Песнь 7

Ирмос: Отроцы еврейстии в пещи попраша пламень дерзновенно и на росу огонь преложиша, вопиюще: благословен еси, Господи Боже, во веки.

Обновил и украсил еси древния храмы обители твоя, преподобне Пимене, таже и новыя воздвигл еси, сего ради монаси, благодаряще тя, зываху: благословен еси, Господи Боже, во веки.

Народное училище духовное в монастыре учредил еси, преподобне Пимене, да познают отроцы закон Божий и безпечальны в житейских нуждах будут, сего ради тии, благодаряще тя, зываху: благословен еси, Господи Боже во веки.

Странноприимный дом, богадельни, лечебницу учредив, построил еси, преподобне Пимене, сердцем болезнуя о нищих, о больных и престарелых иереех и иноцех, о раненых воинех, сего ради тии, благодаряще тя, зываху: благословен еси, Господи Боже, во веки.

Богородичен: Якоже огонь в пещи не опали отроков еврейских, сиче смерть не име власти над тобою, Богородице, поющею, благословен еси, Господи Боже, во веки.

Песнь 8

Ирмос: Безначального Царя Славы, Его же трепещут небесныя силы, пойте священницы, людие, превозносите во вся веки.

Не токмо о твоём монастыре попечение имея, благочинным общежительных обителей в земли московстей был еси, преподобне Пимене, и наставляя еси иноков, како чин монастырский во благо содержать, темже ты монахов сословие воспеваешь.

Искус монашеский от юности сам прошед, преподобне Пимене, защитник монашества делом, и словом, и писанием явился еси, темже ты монахов сословие воспеваешь.

Благодать ангельскаго образа восприяв, преподобне Пимене, оправдал еси имя твое дела. По имени бо житие твое бысть, темже ты монахов сословие воспеваешь.

Богородичен: Ко безначальному Царю Славы, Егоже трепещут небесныя силы, взыде Богоневестная Дева, яко Того рождшая.

Песнь 9

Ирмос: Устрашися всяк слух неизреченна Божия низхождения, яко вышний волею сниде даже и до плоти, от девическаго чрева быв человек.

Темже Пречистую Богородицу, верни, величаем. Святитель Николай Чудотворец воистину бысть

твой покровитель и защитник от рождества до кончины, преподобне Пимене, ты же благодарне послужил еси тому во обители Угрешстей, темже ты вси величаем.

Ангельское пение слышашеся над местом погребения твоего, преподобне Пимене, сице изъявися людем, яко угодил еси Богу житием твоим, темже ты величаем.

Богородичен: Устрашишася небеснии силы неизреченна Пречистыя Богородицы восхождения на небо. Темже Ю, верни, величаем.

Светилен:

Яко светильник монашеским житием и служением ближним возсиял, озарил еси землю московскую, преподобне Пимене, и ныне Христу, Свету истинному, предстоиши, радуяся и о нас моляся.

Слава, и ныне, праздника.

На хвалитех стихиры, глас 4.

Подобен: Дал еси знамение:

Дал еси образ послушания и смирения, /
преблагий Господи, / преподобнаго Пимена на
Угреше, / добродетельми иноческими сияюща, /
целомудрием украшаема и к тебе присно
молящася. / Тем Твою благодать прославляем,

// Иисусе всесильне, и Спасе душ наших.
Дал еси правило веры и упования, преблагий
Господи, / преподобнаго Пимена на Угреше, / о
монашестем чине ревнующа, / и общее житие
устраивающа, / и на Тя надеющася. / Тем Твою
всесильную помощь хвалим, // Иисусе
всесильне, и Спасе душ наших.

Преподобен и незлобив, / пастырь, исполнь
любве / к верховному Пастырю Христу и людям
Божиим, / показался еси, святе Пимене, /
просвещен благодатию небесною, / и
благочестием сияя. / Тем тя ублажаем, / и
честное днесь празднуем преставление к Богу,
// моля о спасении душ наших.

Нестяжанием, простотою и терпением, / яко
щитом крепким оградився, / Пимене, пастырю
ревностный, / правду же, молитву и слово
Божие, / яко меч острый восприим, / с
воинствующими Христа ради Царствие
Небесное наследовати возжелал еси. // И ныне
Царю сил предстоиши Иисусу всемилостивому и
Спасу душ наших.

Слава, глас 2:

Днесь ликовствует радостно Николо-Угрешская
обитель, / и хвалится твоими богоугодными
деянии, / имеющи твоя святыя мощи,
преподобне Пимене, / от них же Божии дары
почерпаем обильно, / подают бо благодатную

помощь / с верою притекающим к честней
твоей раце. / Темже и мы с верою просим: /
моли обители твоей паки возродиться, / и твое
стадо от навет вражиих сохраняй, // и спаси
души наша.

И ныне, праздника.

Славословие великое.

На литургии

Блаженна от канона, песнь 3-я и 6-я.

Прокимен, глас 7: Честна пред Господем смерть
преподобных Его.

Стих: Что воздам Господеви о всех, яже воздаде
ми?

Апостол к Галатам, зачало 213.

Аллилуиа, глас 6: Блажен муж бояйся Господа, в
заповедех Его восхощет зело.

Стих: Сильно на земле будет семя его.

Евангелие от Матфея, зачало 10.

Причастен: В память вечную будет праведник,
от слуха зла не убоится.

[Выкладываю в «Уставные заметки» текст полиелейной службы преподобному Пимену Мясникову, возобновителю Николо-Угрэшского монастыря. Служба составлена **игуменом Андроником Трубачёвым**]

